

兩

山

墨

談

兩山墨談卷之十三

吳興陳霆

文王世子篇稱文王謂武王曰我百爾九十吾  
與爾三焉於是文王年九十七而終武王年九  
十三而終世儒固多疑之以爲年之短長命也  
雖聖人亦豈能與子而竹書紀年則曰武王年  
五十四仁山金氏謂信如武王年九十三之說  
則文王應以十五而生武王前此已生伯邑考  
武王應以八十一而生成王後此又生唐叔虞

人情事理必不然矣緣是以竹書爲信予考之  
太史公載逸周書之言曰武王至于周自夜不  
寐周公旦即王所曰曷爲不寐王曰告汝惟天  
不饗殷自發未生於今六十年康康在牧蜚鴻  
滿野天不饗殷乃今有成今我未定天保何假  
寐夫武王謂天之棄殷自其未生之時迨至今  
大定之日屈指爲六十年則是滅殷之時武之  
年應未及六十竹書五十四之說疑可信也  
洛陽名園記云百花酣而白晝眩青蘋動而林

陰合水靜而跳魚鳴木落而群峯出雖四時不同而景物皆好歐公醉翁亭記云野芳發而幽香佳木秀而繁陰風霜高縈水落而石出者山間之四時也二篇雖語意相類然造語簡古則歐公爲優

左傳宋公享晉侯于楚丘請以桑林注但言桑林者殷天子樂名洪氏雖引呂覽與淮南子二書所註桑林之說然皆不明桑林之爲殷樂與宋有桑林之故今按桑山之林能興雲致雨乃

商世雩帝之所故湯以旱禱于桑林商世因謹  
事之而其祀神之樂即以桑林爲名宋爲商後  
得修其事守故有桑林之樂然用之會享則褻  
矣

泰伯三以天下讓先儒謂三讓同遜也太王志  
欲剪商而太伯不從太王意欲傳位及昌而太  
伯逃去于時商日衰而周日彊周蓋騷騷有代  
商之勢太伯乃棄而不取是其父子昆弟之間  
實以天下相遜也且其迹隱微故民無得而稱

焉子讀吳越春秋古公病將卒令季歷讓國於  
太伯而三讓不受故云太伯三以天下讓吳越  
春秋作於東漢趙曄前人謂其去古未遠又曄  
越人宜知吳越之故然則三讓之說豈曄固得  
其實耶但春秋史記無之則又疑後人因論語  
之文而僞補其說是未可知也姑存之  
漢公主間有私夫如竇太主則董偃蓋長主則  
丁外人皆通朝所知而公卿所推接然董偃死  
與竇主會葬於霸陵此尤異事也

潘氏榮曰漢文沉潛而不能剛克然夜拜宋昌而收兵權遣哭薄昭而殺元舅納坐席之諫而竟奪祗席之愛躬騎射之習而欲親行匈奴之伐此亦剛克處也漢武高明而不能柔克然憚汲黯之嚴直欲太子之仁柔悟神仙之妖妄而思寡欲以卻疾罷輪臺之田作而知悔過以遷善此亦柔克處也

伍子胥之爲人曾無足取何者父兄之讐言不共天然君臣之誼無所逃於天地之間則二者固

相等也伍氏三世爲楚忠臣子胥則忠賢之後  
宜與國共休戚者也奢尚之死雖曰非辜然本  
由費無忌之譖平王特失於不明耳以桀紂之  
惡而龍逢比干之後不敢讐其君曾謂忠賢之  
後同休而共戚者顧可以甘心於宗國乎方其  
奔吳也既身預公子光之弑復計滅王僚之胤  
較其心迹去交亂四國者不遠也入郢之役暴  
及陵墓夫乃祖乃父向嘗北面而事之矣今爲  
子孫世臣之列者乃一旦而鞭僇其屍可乎太

白之梟君子猶不滿於武王胥獨何人敢遂不  
顧於天下之名義也且信諛而戮賢自平王之  
罪昭王何預焉今讐人之父而伐及其嗣讐人  
之主而辱及其夫人則復讐之誼不已濫乎故  
夫子胥者知有父子而不知有君臣知有強吳  
而不知有宗國屬鏤之賜天蓋以平王之戮奢  
尚者報其入郢之無禮非不幸也山陽瞿氏於  
胥事謂其能用吳以復父兄之讐又能爲夫差  
復父之讐是其孝爲有餘夫以父兄之故而讐

君則移孝爲忠者何誼懷宗國之恨而外引強敵則始終爲韓者何心瞿氏之論要非義理之正不可訓於後世而世之君子徒以胥盡誠于吳而被戮故例爲之悼恨吾今暴之亦春秋不隱惡之誼也又按楚鄭公曰自敵以下則有讐非是不讐上虐下爲討君而討臣何讐之爲若皆讐君則何上下之有乎凡鄭公之言如此則春秋之士固以爲君父不可讐矣乃知申胥之言其責胥者雖甚正然亦落第二義也

又左傳云敵惠

敵然不在後世此  
皆可為復讐之漸

張弘範張世傑李兄弟也而一為元伐宋期於  
削平一奉宋抗元志存社稷比於諸葛弟兄又  
有間矣

元魏孝文遷都于洛國人皆不欲內徙時以北  
方酋長及侍子畏暑聽秋朝洛陽春還部落時  
人謂之鴈臣然鴈臣二字甚新

愛日齋叢抄載唐文宗開成二年詔朕之生辰  
不欲屠宰用表好生自今宴會蔬食任陳醢醢

永爲常例以爲古帝王生日禁屠宰之始然隋文帝生日詔天下爲其母明元皇后斷屠以示報本則生日禁屠宰自隋已然矣非始於唐開成也

秦時拘繫無辜民不知罪咸仰天嘆曰怪哉怪哉憂憤之氣感而生虫色赤而頭目耳鼻齒牙俱備漢馳道中有此物詔問東方朔朔對如此且曰所產之地必秦獄也按地圖果然又問何以去虫對曰凡憂者得酒而解乃令人取虫浸

酒中須臾糜散予然後知古今謂酒能消憂者  
本此曹孟德詩云何以解憂惟有杜康杜康謂  
酒解憂蓋用朔語也

日月之會于朔歲十二次會而同入於黃道則  
必交交有初有中凡交則日月必食凡食皆月  
掩日陽光爲陰魄所蔽故爲日食如日月雖會  
而月行或入外道或入內道非同於黃道一宮  
則自不相薄矣月食必於望夜其十四十六夜  
者則置望參錯故也凡望夜則月與日相對故

光獨圓滿然日光四射而正中光猶所不足處則爲暗虛月行而入暗虛則無以承日之光故爲月食然以太陰用壯而敢與日抗故墮於暗虛而爲食以是亦爲陰盛之象也

岳武穆平湖寇楊么決勝於八日之間初駭其秘籌妙筭若與鬼神爲謀非人可矚者今讀薛弼傳則知岳所運用弼之策耳初么據洞庭陸耕水戰樓船高十餘丈官軍徒仰視不得近飛謀益造大舟弼時運判湖南謂岳曰若是則未

可以歲月勝且彼之所長可避而不可鬪也今  
大旱湖水落洪若重購舟首勿與戰遂筏斷江  
路橐其上流使彼之長坐廢而精騎直擣其壘  
則破壞在目前矣岳曰善遂用之於是積寇遽  
平岳之奇功照映今古而弼之謀盡則知之者  
鮮當爲拈出

齊人饑黔敖爲食於路以待飢者而食之有饑  
者蒙袂輯履負貿然來敖左奉食右執飲曰嗟  
來食揚其目而視之曰予惟不食嗟來之食以

致於斯也從而謝焉終不食而死宋洪冀謂以  
文意推之揚其目而視之終不食而死其上皆  
當有餓者字從而謝焉上當有黥教字以予觀  
之仍其本文亦自意足仍其文正足見檀弓之  
高古也

元末明王珍據蜀稱帝傳其子昇母太后彭氏  
同聽政我

太祖既即帝位昇猶阻拒聲教於是命將討之俘  
其母子至闕下責以歸命不早欲戮之彭氏廷

對曰臣妾今死無詞矣向以先夫疆土託在臣  
妾夫業一日未止則臣妾一日未應死今已矣  
即死無恨

太祖義其言因全族赦之編置海南初僞夏聞王  
師致討恃其險阻以重兵守瞿唐劍閣成都等  
處其僞都重慶顧以天險難攻絕命老弱守之  
將軍傅友德以奇兵由土番進連克諸郡遂據  
成都湯和等得報進克瞿唐徑造重慶夏人守  
銅鑼峽兵不得逞計無所出乃周視形勢隔江

有清風嶺與其朝天門相直遂於其上置砲座  
用巨砲名襄陽者連飛數四碎之於是其城墮  
守者震恐無復聞志遂以出降此得之戶曹主  
正羅君某羅即重慶人渠云聞之父祖其詳如  
此

張然滯役多年婦與奴通後然歸婦與奴謀害  
之其犬烏龍注目聳耳舐唇視奴然呼曰烏龍  
烏龍大應聲傷奴奴失刀仆然取刀殺奴然則  
烏龍以名犬也元稹韓致光詩皆有烏龍語蓋

出然事而章伯深不知乃舉俚語拜狗作烏龍  
爲據何淺聞也

老子曰道者藏精於內極神於心靜漠恬淡悅  
穆於胷中廓然無形寂然無言官府若無事朝  
廷若無人無隱士無逸民無勞役無怨刑天下  
莫不仰止之惠他國殊俗莫不重譯而至非家  
至而人見之也推其誠心施之天下而已賞善  
罰惡者正令也其所以能行者精誠也令雖明  
不能獨行必待精誠故以道被民而弗從者精

誠弗包也此即吾儒無爲而治王道本諸天德之說也但吾儒所謂無爲者得人以任衆職久之民化俗成而不見有爲所謂天德者精一以盡交修久之體立用行而推無不準老子乃一切歸之無所容心此其所以慙於虛寂而目之爲異端也

晉顏含不肯從郭璞筮其言曰修己而天不與者命也守道而人不知者性也自有性命無勞簪龜宋晁文元平生不喜推衍之術其言曰自

然之分天命也樂天不憂知命也推理安常委  
命也何必逆計未然哉二公之言如此真達生  
信命者也

耶律德光入洛陽聞杜鵑以問李崧曰此何聲  
也崧以杜鵑對然則五代之時洛中已有杜鵑  
矣邵康節散步天津橋聞杜鵑聲謂客曰洛陽  
舊無杜鵑今始至去後二十年必有南人作相  
務變更以亂天下者邵子所謂始至豈其一時  
創見而不知有前事耶但晉出帝之後甫十四

年乃開有宋之治自後高位亦間有兩人然天下日蹙太平杜鵑之聲其兆于宋初者不聞蓋中國之亂而妨北方之治然則此又何也

今之椰盃產於交廣相傳林邑王與越王有怨遣刺客得其首因梟於樹已而化爲椰子林邑王憤之乃命製爲飲器蓋當時方大醉故今椰漿味尚如酒飲之可辨然予嘗記烏孫國有青田核如五六升瓠空之盛水俄而成酒宋有劉章者得二核集賢設之一核才盡一核又熟

可供二十客豈亦椰之類耶但椰漿素所醞而  
核之酒則臨時所釀此爲特異竟亦莫知爲何  
木也

堯讓天下於許由由非山林逸士也左傳云許  
太岳之後太岳意即由耳古者申呂許南皆四  
岳之後堯典曰咨四岳朕在位七十載汝能庸  
命遜朕位讓由之舉或即此也若飲牛棄瓢之  
說或者由不敢當其讓遂逃避于野如益避啓  
於箕山之類後人不知槩謂堯以天下讓一山

野之人甚可駭也如舜本黃帝之後其父瞽瞍  
實繼虞氏之封太史伯頌虞幕云幕能協風聽  
樂而生物自幕至於瞍無違命則瞽瞍未嘗失  
國舜則國之冢嗣也舜所居成聚成邑成都蓋  
國人化而歸之而牛羊倉廩則國諸所固有若  
陶漁耕稼亦督視省勸之意非必身親爲之也  
瞽瞍惑於後妻而愛其少子意以舜居嫡長而  
終有國故與象曰欲殺之斯蓋奪嫡之計不然  
舜果一窮微之人乃父乃弟亦何緣而必欲害

之也哉象之稱舜曰謨蓋都君則舜是時已爲君長可知而舜亦知象之意在於爭國也遂舉以讓之曰惟茲臣庶汝其與予治觀此則舜非畎畝之野夫明矣自孟子有飯糗茹草木居豕遊及天子友匹夫之言故後世往往謂舜起匹夫而爲天子緣是興奸雄非聖之心不知孟子之言亦有若今文人之詞者固不可盡據也抑太古尚質而聖賢皆重民事故舜雖國之冢嗣而陶漁耕稼亦所不鄙如禹稷皆繼世受封而

一任水土之勞一親播種之事任之者固不以爲恥而當時亦不以爲怪非若後世有工有官者崇高貴重而深居高拱其於民事邈乎不聞者也

晉惠帝永康元年納后羊氏將入宮衣中忽有火衆咸怪之後后坐廢時以爲先事之兆然予嘗觀張靖之方洲集內記景泰中一日暮歸入室更衣暗中有火星星自裙帶中出晶瑩流落凡三四見家人相顧失色忽憶張茂先積油致

火之說而所服乃吳綾俗所謂油段子工家又多以脂發光潤兼時以被酒氣蒸因是致火本無他異也羊后所致或亦類此而當時特以其不終遂以爲怪異云耳

東坡韓文公廟碑云申呂自岳降傳說爲列星傳說指商之良弼也然石氏云傳說者章祝女巫巫之官司天王之內祭祀以祈子孫故有太祝以傳其說於神宮或遂謂之殿相說自莊周吳言始鄭氏云傳說一星惟主後宮女巫祠求

乎之事蓋古有傳母有保母傳說者謂傳母喜  
之也偶商之傳說與同音諸家不詳其義則曰  
傳說竊箕尾而去由石氏言則傳者附達之意  
而說爲言說之說由鄭氏言則傳者保傳之義  
而說爲喜悅之悅二說雖未知孰是然謂之商  
相說則於星所主不相類知東坡亦不免於承  
誤也

佛說遺教經專以端心正念爲首而深言持戒  
爲禪定智慧之本至謂制心之道如牧牛馭馬

不使縱逸去。瞋止。妄息。欲寡。求然後由遠離。以至精進。由禪定。以造智慧。其說具有漸次。與所謂頓超徑悟者異矣。今以吾儒求之。端心正念者。正心誠意也。持戒爲禪定。智慧之本。慎獨爲天德之要也。牧牛則鷄犬之喻。馭馬則朽索之說。去瞋止妄。息欲寡求。閑邪存誠。養心寡欲也。由遠離以至精進。所謂下學而上達。由禪定以造智慧。所謂定靜而安。慮凡釋氏之言。合於吾儒者。予謂此獨爲最切也。

東坡之言曰文人之窮也固宜勞心以耗神盛  
氣以忤物未老而衰病無惡而得罪鮮不以文  
者乎非文人而所性所值實慄此言以是知坐  
困不免也

兩山墨談卷之十三

兩山墨談卷之十四

吳興陳霆

潮州廟碑坡公非獨以頌韓也蓋公平生歷履  
與其學業事功適有相類者故感慨發越於此  
碑露之而騎龍之詩氣槩雄厲真有凌轢萬象  
之意且其首以善養浩然者立說此則公所得  
之秘密藏也超然臺記又見公樂天安土皆其  
氣之百折而不餒者有以本之故海外之行雖  
鯨波再涉而不惧鬚髮皆變而無所改於中視

夫嘆老嗟卑悼遺佚而憫厄窮者徑庭矣

醉白堂記云天之生是人也將使任天下之重則寒者求衣飢者求食凡不獲者求得苟有以與之將不勝其求是以終身處乎憂患之域而行乎利害之途議論是矣而語若少疵古之君子其任天下之重者皆心乎爲民而已私無預焉禹思天下有溺者由已溺之也稷思天下有飢者由已飢之也伊尹視匹夫匹婦有不獲者由已推而納之溝中其所爲任天下者類如此

夫天覆盛滿而負危疑者異矣然則憂患利害  
非所以施於賢哲也若曰苟有以與之將不勝  
其求是以終身處乎憂患之域而行乎焦勞之  
途則庶乎語穩而理當然亦一時偶見如此固  
非敢妄病乎大賢也

古今美色亦有爲人掩抑而名不彰者紂所嬖  
二妾史記汲冢書胥謂武王入商紂之嬖妾二  
女皆經自殺今按二妾一爲妲己其一名氏不  
著蓋妲己專美世故畧之也越納西施鄭旦於

吳皆天下絕色吳易其名曰夷光脩明越旣入  
吳二人方止苑中樹下兵士望見以爲神女不  
敢前犯楊鐵崖咏范蠡事所謂西施鄭旦坐兩  
頭者是也今天下談者獨稱美西子之色而鄭  
旦之名幾於泯沒然以爲西施所掩故亡吳之  
罪獨得以逭天下後世之責焉是則未爲不幸  
也

南平趙弼著效顰集其鍾離叟一傳蓋寓言以  
詈安石嘗喜其幻設之妙然古實有邂逅若此

者盧多遜南遷食於道旁逆旅有姬頗能言京  
邑事盧問其何居於此姬輦感曰我本中原士  
夫家子任某官盧某作相令枉道爲某事吾子  
不從盧啣之中以危法盡室竄南荒未周歲骨  
肉淪沒惟老身流落山谷間彼盧相者妬賢怙  
勢恣行無忌終當南竄幸未死間或可見之耳  
多遜默然趣駕去然則鍾離叟意傲於此  
春秋書趙盾弑其君左氏載董狐之言曰盾身  
爲上卿而亾不越境返不討賊弑其君者非盾

而誰予謂此言亦未足服盾也弑行於趙穿穿之進用以盾之族子也盾以驟諫而積靈公之怒則其君臣之間必相猜嫌乖拂固非一朝一夕之故矣公不果於殺盾而盾出亡度其當時事勢必有甚危迫者穿爲之族子其能自安於位乎必也公朝有誅夷之謀而族屬有連及之惧非穿弑公則公族趙固有所必至者故嘗追原其始而深考其故知穿素無怨於公其爲此舉特欲復盾而免趙也是則雖未嘗有所受意

而發端肇禍皆由於盾穿以盾故而弑君公以  
盾故而被弑是穿特成濟之流耳然則首惡之  
名非盾其誰當哉譬之父兄與人爭鬪而子弟  
同事者從旁殺其人按獄之法罪坐所由則子  
弟固從而父兄則首禍者也以是論盾當必無  
詞矣而何假不越境不討賊之云也哉王導有  
言我雖不殺伯仁伯仁由我而死盾之與公事  
正類此仁山金氏以盾不越境固必授命於穿  
此則深文矣大夫屠岸賈討靈公之賊其言曰

盾雖不知猶爲首惡則是當時朝論固謂盾未  
嘗知也而可以授命誣之乎其爲法受惡越境  
則免先儒已辯其非孔子之言識者固知之矣  
玄不復論又按左氏河曲之役士會謂秦伯曰  
弱不在軍事好勇而狂若使輕者得焉其可以  
晉悼公在秦人于河卒當軍門呼曰死傷未收而  
康之不惠也不待期而薄人于險無勇也乃上  
觀此則穿之狂躁易動蓋性成也其於行或公  
其無難者盾之返國不惟不討且使之逆成  
于尉則將護之明矣以其舉措而察其心則首  
惡之坐罪如  
之河其可免

綱目漢元帝元年立婕妤王政君爲皇后汪寬

寬考異云按唐高宗立武氏爲昭儀綱目書太宗才人以著其塵聚之醜然唐詔謂事同政君據甘露中書皇太孫驚生注謂帝令皇后擇後宮家人子得元城王政君送太子宫至是生成帝則此上當先書以宣帝宮人王氏爲婕妤予細考之意竊不然蓋武氏經事先帝高宗不顧倫理不畏公議而立以爲后故綱目謹書其始以著其醜政君爲宣帝令后擇取以賜必於宣帝無嫌而元帝素得於受命又何他疑也唐以

武氏事同政君正欲借此以掩其失耳

古人以飲茶始於三國時按吳志韋曜傳孫皓每飲群臣酒率以七升爲限曜飲不過二升或爲裁減或賜茶茗以當酒據此爲飲茶之証予閱趙飛燕別傳成帝崩後后一夕寢中驚啼甚久侍者呼問方覺乃言曰吾夢中見帝帝賜吾坐命進茶左右奏帝云向者侍者不謹不合啜此茶云云然則西漢時已嘗有啜茶之說矣非始於吳時也

古有記里鼓車莫考其制一日得楊鐵崖所賦  
始測其彷彿其云虛輪暈軫橫轆倚輓平廂層  
構低高間施木鐻象以正立手潛奮而有携列  
鼓鐻於上下各扣擊以司時始越里以一發繼  
遙遙而運規途倍五以至十鏗金聲以應期縱  
征行之徐疾咸適節而合宜雖亭隍之旁羅已  
默測而先知此車制之大槩也嘗記本朝曾  
以命題試士俱莫知其說因筆之以示學者  
龜山語錄有云物之有圭角者多刺人眼目亦

易玷闕故君子處世當渾然天成則人不厭棄  
矣予謂渾然天成者亦謂謙厚有容含蓄不露  
其於處已接人之際使我無所觸而彼無所拂  
如是斯可矣若緣此言而務爲依阿俯仰滑稽  
鵲突則固君子之所鄙也

海外有直臘國其土風國俗元人周達觀記之  
甚詳中間紀其曆法謂中國閏歲則彼亦置閏  
但只閏九月殊不可曉偶記秦時以十月爲歲  
首當閏之歲無問何月率歸餘於歲終爲後九

月漢初亦襲用之至征和間始改宣真璽置曆  
亦若漢初之循用秦法而至今尚承襲耶

綱目卒吳讓皇楊溥劉友益曰書卒何予徐誥  
也自宋弒零陵是後滅國之主無不殺者惟唐  
鄒公書薨於是楊溥亦書卒若徐誥者可謂庶  
幾矣考之五代史吳世家冬十月溥禪位於齊  
王十二月溥卒於丹陽年三十八別無他詞意  
謂溥獲善終將信知誥之存厚矣近觀五國故  
事乃知溥遷丹陽宮及將逼殺方誦佛書於樓

上使者趨前溥以香爐擲之俄而見害然則溥之卒實徐誥弑之耳蓋通鑑綱目皆本之五代史而歐公以家世隸江南故於其國多諱辭吾今特暴之庶後之學者不至於誤信也

唐僖宗之崩以馬踐宋太宗之崩以箭瘡發二事史冊皆不明言蓋當時秘之也僖宗寵內園小兒張浪狗一日浪狗以無馬告因密與百金俾自買之浪狗求得馬置宣徽南院中僖宗因獨行觀之巡繞馬左右謂浪狗曰好馬好馬其

馬未經調習忽爾騰躍踏僖宗左脇遂倒地欲  
死浪狗驚惶以銀盂注尿灌之良久方甦歸後  
稱氣疾醫人候脉謂爲膀胱氣作投治莫效卧  
十二日而崩太宗既下太原遂伐契丹至幽州  
虜兵大至宋師奔潰虜急追之太宗僅得脫凡  
乘輿服御寶器悉爲所擄從行宮嬪皆陷没太  
宗股中二箭歲歲瘡發其棄天下竟以瘡疾發  
云僖宗事具於幸蜀記太宗事得於神宗諭滕  
章敏之言即此二事例之知古今史書其不得

盡實者必多矣

宋斧聲燭影之疑瓊臺丘氏辯之詳矣新安程克勤氏著宋史受終考一書其援引證據與丘氏畧同而尤爲信核千載之後當不復有可疑者太宗天資忍薄固不無可議然謂其弑逆則誣枉甚矣其不踰年改元宋后崩殯于佛寺皆五代故習當時以爲固然踵而行之而後之儒者吹毛索瘢遂指以證其無兄之心而以其後日之乖違實其前日之兇逆此皆先入之疑勝

而不考之過也

取天下者要在乎據天下之形便。嬴秦居西戎之地，知韓魏者天下之樞也。故無滅不加兵於二國，以爲得韓魏則天下不足舉也。蜀漢君臣崎嶇奔竄，英雄無用武之地，故孔明不得已而取益州。然則知荊州中原之襟喉也。於是或借或分，或爭或據，類歲交兵，竟失吳好，以爲得荊州則中原可進步也。故韓魏入秦則山東之國以次潰滅，而秦人終有天下。關羽被襲則中原

之計坐成隳敗而蜀漢僅可自保足以得天下之形便與否而已

嘗讀史至三國劉玄德伐吳一敗狼狽竟慚恨致疾諸葛亮曰法孝直若在必能止主上此行雖行亦必不至於敗然則孔明固知伐吳非計矣而不能先事諫止何哉先儒謂孔明固必諫意者不從耳此未必然也夫先主之與飛羽其夙契深厚雖名爲君臣而義則骨肉也孔明以一時遇合而專主其國固嘗致其不悅矣及羽

敗歿而先主念羽之厚乃決然欲爲其報讐孔明雖知事之非而度其勢必不可止且其時飛超之徒尚在必相與悼恨忿怒而贊成此舉孔明雖欲亟止是行寧不慮諸人之疑已之棄薄其同功一體者乎故孔明知而不敢諫而謂惟孝直爲開國謀臣且處不疑之地乃可以堅沮而衆不忌也然孔明初意本謂吳蜀連睦庶可合勢而拒魏故以伐吳爲非而勢不可已則姑聽其出而詎意挫敗之一至如此哉故曰兵兇

戰危勝敗不可期而天下之所謂智者固不能免千慮之一失也

書金縢載周公避流言之謗居東二年蔡氏云居東者居國之東也鄭康成謂避居東都未知何據愚按武王克商展其九鼎置之洛邑逸周書載武王告周公曰我南望三塗北望岳鄙顧瞻有河粵瞻洛伊母遠天室營周居于洛邑而後去是克商之初武王已作意都洛矣特以時尚草創未暇營建然而聚民寘鼎大規已立未

幾武王殂成王繼先志卒營置焉以其在鎬京  
之東故平王以後稱爲東周計在武王末年或  
謂之東都未可知也周公時欲遠謗故特避居  
于是而鄭氏漢人意者尚知周之故以是決言  
居東之爲東都耳若謂國之東則不越王畿之  
外固周公常日所主之地也何東人幸於得見  
而悲其遽去耶

韓文載石鼎聯句在列者有道士軒轅彌明其  
句往往崛竒高古或者謂即退之所撰而託名

彌明未必有是人也。今按張南軒於淳熙間守靜江，其奏疏有曰：「臣所領州有唐帝祠，去城二十里而近，其山曰堯山，高廣爲一境之望。祠雖不詳所始，然有唐衡岳道士彌明詩刻據此，則知聯石鼎者果有其人矣。」

書君與篇在太戊時，則有若伊陟、臣扈、孔安國以伊陟爲伊尹之子。蔡氏因之。今按伊尹於太甲復政之後，即已告老，其卒在沃丁之六年。陟果其子，其生當在太甲之世。然自太甲至太戊

中更沃丁太庚小甲雍已數君則後相距蓋一  
百十餘年陟果壽度至斯時當耄耋矣固無  
求政理也又不知其在相位實幾何年而其老  
死亦不知與太戊相距何若太戊享國七十年  
假令陟與之相始終則頃年百有八十天下寧  
有是耶伊尹年百有餘歲世儒已詫其壽考陟  
果有年亦未應過尹之如是也故疑陟爲尹之  
後人而時有格帝之功可以匹休於尹故周公  
特爲君奭言之世儒不考遽謂尹之子耳

海中有鰕夷國其人鬚長四尺善弓矢令人挿箭於首遠數十步而射中之國名鰕夷以多鬚也酉陽雜俎載一士人隨新羅使飄至一處人皆長鬚王以女妻其人美而亦鬚因作詩云花無益不妍女無鬚亦醜久之國有難士人爲求救於龍王因悟爲群鰕所魅焉所遇乃鰕島也大槩如烏衣國之類此殆因鰕夷之名而造爲怪誕之說庸詎足信也

快山山溪亦有虎時時安尾過行路一豎坐地

牧雨沾以捶捶地不復顧虎搏豎如鷹獨免兩  
牛來奔虎棄去因往荷痒挨老樹牯則喘視同  
守護虎竟不能得此豎豎雖不救牯無負一村  
器傳共鳴鼓而虎已逝不知處嗟哉異哉兩大  
武高義可與貫高伍今假仁義名好古臨事真  
情乃愧汝此事可信文公語爲君落筆驚風雨  
洪覺範云筠溪快山有虎嘗搏取牧童爲兩牛  
所逐虎旣去牛捍護之然童子竟死因作詩紀  
之以諷含齒被髮而不義者予記宋紹聖小人

有目司馬公爲牛者黃定者不平作冤牛文以  
雪之其說云村民耕甚疲枕犁而卧乳虎出翳  
林間欲前啖之一牯蔽其人以身而抵虎以角  
轉闘甚力虎不能得乃棄而去少頃村民寤視  
牛蹂躪之處意以爲妖乃杖之牛不能言而奔  
歸乃解其體食其肉而牛出死力以衛其人之  
生卒莫能自明也嘻冤哉又記程史特牧相衛  
事其謂虎出如前所云然欲擇特則牧與之聞  
牧意則特與之抗更互迭進久之村民嚙呼而

前虎始逸去而特牧竟全吁亦異矣夫快山之  
牯雖能宣力而竟不能全其牧負寬之牛雖能  
全主而竟不能保其身嗚呼天下之事限於力  
而蒙乎疑者衆矣安得牧特兩全彼此相信愛  
如程史所云者哉

兩山墨談卷之十四

兩山墨談卷之十五

吳興陳霆

子房進履於圯邊韓信受辱於跨下後一爲帝  
者師一南面而王蓋惟能下人故能上人也然  
子房猶號知道揚誠齋詩云少年跨下安無忤  
老父圯邊慚不平人物若非觀歲暮淮陰何必  
減文成信乎先民有言保初節易保晚節難觀  
之淮陰可見矣

史記秦楚月表叙曰昔虞夏之興積善累功數

十年德洽百姓攝行政事考之于天然後在位  
湯武之王乃由契稷修行仁義十餘世不期而  
會于津八百諸侯猶以爲未可其後乃教伐秦  
起襄公彰於文穆獻孝之後稍以蠶食六國百  
有餘載至始皇乃能并完帶之倫以德若彼用  
力如此蓋一統若斯之難也詳其文意以德者  
是指虞夏商周而言用力者殆指秦也蓋謂昔  
之欲一天下者用德如虞夏商周必積累數十  
世而後成用力如秦亦須更涉數世而後克所

謂一統之難如此索隱不察其意乃於以德若  
彼下註曰即契與后稷及秦襄文穆也用力如  
此下註曰謂湯武及始皇也夫以秦世數公之  
蠶食爲用德而以湯武之伐暴爲用力此殆後  
世非聖叛道之言豈儒者之論哉

叔孫通希世苟合之士其爲秦博士二世怒諸  
生之言反者通即詭曰諸生言皆非也夫天下  
合爲一家毀城鑠兵示天下不復用且明主在  
上法令兵於下使人人奉職四方輻輳安敢有

反者此持群盜鼠竊狗偷何足置之齒牙間二世乃喜追秦臣則事楚楚蹶則降漢無衣楚製取悅高祖兩生有言通所事者且十主皆面諛以取親貴是其志行不信於人久矣然則豈以身殉國者哉其諫易太子特一時小忠而楚漢春秋乃云臣三諫不從請以身當之撫劍將自殺太史公亦載其言曰陛下必欲廢適而立少臣願先伏誅以頸血汚地此不過勉爲危言以聳動高祖倘信其守死不貳則誤矣

古者以車戰三代以前未用步也晉伐無終及  
群狄于太原將戰魏舒曰彼徒我車所遇又阨  
以什攻車必克困諸阨又克請皆卒自我始乃  
毀車爲行設五陣以相離誘之群狄大敗是後  
世之步戰始此

公羊傳威十六年屬負茲云云注云屬托也諸  
侯疾稱負茲言托疾也然茲義未詳或謂茲草  
也負茲猶言負薪蓋譌言有疾不能負草也予  
謂不然史記叙武王入商事康叔封布茲注云

絃蓐席也然則負茲者蓋言有疾而負蓐如所  
謂坐蓐伏簣也

范元卿上太守月詞中有云有人吟諷紫荷香  
滿晴陌韻語陽秋云按晉輿服志八座尚書則  
荷紫以生紫爲袷囊服之在左肩所謂荷紫者  
非荷芰之荷乃負荷之荷也人徒見南史着紫  
荷囊四字遂作一句言之蓋不知晉書荷紫之  
義予讀宋史宣和間任子太濫有年始十餘歲  
而蔭補通顯者諫官李會疏論以謂尚嬉竹馬

已獲荷囊以荷囊對竹馬則紫荷相承之誤久矣

衛懿公好鶴鶴有乘軒者乘軒蓋恩禮視大夫也而北齊後主臨御爵祿輕濫御馬及犬乃有儀同郡公之號籍以旃罽食物十餘種蓋前乎此而秦松封五大夫後乎此而宋石爵磐固侯卒之召亂致禍如出一轍然後知先王之重名器而卻玩好非志慮之明遠不能也

左傳成十六年晉伐鄭楚子救鄭遇於鄢陵楚

子登巢車以望晉軍子重使太宰伯州犂侍于  
王後王曰騁而左右何也曰召軍吏也皆聚於  
中軍矣曰合謀也張幕矣曰虔十於先君也徹  
幕矣曰將發命也甚囂且座上矣曰將塞井夷  
竈而爲行也皆乘矣左右執兵而下矣曰聽誓  
戰乎曰未可知也乘而左右皆下矣曰戰禱也  
此節皆聚於中軍矣張幕矣徹幕矣甚囂而摩  
上矣皆乘而執兵下矣戰乎乘而左右皆下矣  
皆楚子望見而疑問之詞曰以下則州犂答詞

也楚子之語總之以王曰一言而下節則不復有所系然其語句簡便意脉通貫此正左氏善叙事處使他人叙此不知當費幾何語矣此作文之法學者不可不知也

南宋諸陵在會稽縣之上皇村至元二十二年八月內爲西僧楊璉等所發周草窻雜識畧云初徽欽葬五國城數遣使祈歸梓宮凡六七年而後許旣還行在一時朝野以爲大事諸公論功受賞所費不貲先是選人楊煒貽書廟堂乞

奏請大臣取神襪之最下者斷而視之朝議以不欲逆詐請用安陵故事梓宮入境即承之以擲納衾冕輦衣其中遂不復改歛至此被發徽欽二陵皆空無一物徽陵有朽木一段欽陵有木燈檠一枚而已蓋當時已料其真僞不可知徒慰一時之人心耳而二帝遺骸浮沉沙漠初未嘗還也每閱至此私恨虜讐之深宋茹冤之極然考之史傳蓋有未足信者紹興十二年和議成金人以徽宗鄭后梓宮來歸于時欽宗尚

在也至三十年逆亮謀南侵於是遇害于燕然則塋五國城之說妄矣未幾孝宗登極遣使求河南陵寢地金主曰汝國何舍欽宗靈柩而請鞏洛山陵如不欲欽宗之柩我當爲爾國葬之明年三月竟以一品禮葬于鞏洛之原是欽宗之柩終南宋之世未嘗返行在也然則又安有攢宮於六陵之間耶夫攢宮且未嘗有而水燈檠又安所寄耶即是而推則朽木之說疑元人習聞當時有逆詐之言故附會妄傳而致記者

之誤信耳

程學士嘗預修宋綱目謂得於黃文獻公之言  
乃信陞秀夫官止簽書樞密院事文文山官止  
樞密使同都督諸路軍馬因遂奏御悉改舊史  
所稱於文死節日書殺宋少保樞密使信國公  
文某陸抱帝赴海日則止書其氏名且謂當時  
同事者見世習稱二公爲相憚於驟更惟彭文  
憲與予意合予竊疑之考之宋史與陳氏續編  
俱載德佑二年正月拜文公右相兼樞密使往

使伯顏軍前公辭相以行被執而逃五月益王即位公自溫州入朝申右相兼樞密使之命至六月復詔公同都督諸路軍馬乃出開府日其次第可考不誣而程主於前言乃於入朝命相之條止書以爲樞密使同都督諸軍於其目中添著命相固辭之語且合六月所詔同都督之命於命樞之日此其自信而好異之過也考文公在當時其自鎮江得逃楊有脫歸兵言元密遣一丞相入冀州說降丞相謂公也公以夜抵

楊城下聞候者談制司下令備文丞相甚急張  
弘範語厓山士民曰汝文丞相已執復欲何爲  
厓山亾日置酒大會張謂公曰國亾丞相忠孝  
盡矣能改心以事今將不失爲宰相也是丞相  
之稱在當時已習雖然此未足據也指南錄公  
所著也而有句云爭元作相總成塵先太師祭  
文公所誤也而有句云再相出督身荷憂責臨  
刑之日元主問其何願對曰天祥爲宋宰相安  
事二姓然則其自言亦固謂爲相矣若其年譜

本傳則皆書云辭者此實有故蓋古者國亡則責備於君相當時宜中世傑實用事公雖任相而出督于外朝事不預知意以他人壞之而已當其待天下後世當必有責備之者雖公以身殉國而亦不免介介於後世名此所以有命必辭而不得已則出而任事年譜本傳亦因公之心迹而書之然告詞錄黃不聞繳納則固已爲相矣若陸之除拜則又有可言者陸初與陳宜中不協謫居潮州後張世傑言諸行朝召爲簽

書樞密院事時景炎二年之十月也續編載祥興即位以陸爲左丞相兼樞密使與張世傑同秉政程乃削而不錄謂其死日官止簽樞夫自景炎召還至祥興二年死國踰越三載安得猶守初職也且承平之時兩府轉遷尚不踰歲此爲何時而用人乃爾艱難之際命相爲急于時宜中旣逃文公出督張世傑雖稱秉政而以武臣不拜然則首尾三年之間其任相者誰歟陳仲微從二王入廣目擊時事其所著衛王本末

云祥興即位以陸秀夫爲丞相張世傑太傅指南錄亦云陸君實永嘉推戴有力及駐厓山兼宰相凡朝廷事皆其潤色紀綱之據此則陸固厓山之相也吾意當時播越海濱封拜草草雖以陸之入相而遠近或未悉知迨其滅亡而紀事如填海等錄追書舊事習其初稱故但云已耳而程乃盡廢舊史獨據以爲筆削之案此又其自信而好異之過也二公之取重於天下後世初不係於官爵獨謂續綱目旣詔行誠慮夫

學者不考而宗信之也故著其說於此

嚴光之不屈世皆謂其立志高潔此知光之外  
者也新安程克勤曰先生當西漢末避莽亂棲  
迹草澤以待天下之一遇光武之主猶以爲未  
慊而去之非其君不事也侯霸亦先生故人位  
三公矣仁義阿順之語凜然下飭若免焉非其  
友不友也先生之學雖莫知所從來殆必有發  
之中而安放之遠而準將與伯夷相望而興者  
所謂非常人也其立論頗異流輩然獎與疑大

過矣原光與帝舊同硯席其相處非一朝一夕而已燕昵之私徵逐之狎在人情所不能免而況其時光已年長視帝則子弟行也則夫語言容色之間寧免於倨肆而周旋禮度之際安保其無缺耶及帝登極光疑其或未能忘已而容物於是變姓名隱之澤中而帝追念故人意不能忘也乃遣使物色之迨其詣闕而後偃卧於賓館加足於帝腹凡此皆光欲以當帝而俟霸雖舊人然不能知也故雖位居鼎足而輒有癡

兒之譏要領折之警觀此則光之素挾長凌物  
微可見矣諫議之除帝將資其鯁諤之益而光  
以受命于朝當必改趨易步強已所不能而隨  
時俯仰則夫君臣之形迹上下之名分恭遜之  
容軀承之態度不能一旦黽勉而曲盡其禮於  
是終於辭避至以堯舜巢由之言婉卻之而帝  
亦度光不可留強之或累異日之保全也乃聽  
其去然前此有狂奴故態之言則帝之微意可  
見矣此則光之始終表裏春秋所謂推見至隱

晦日有食之景帝後三年十月日月皆食云十月而不繫以日必是月朔望日月分食非一日事也是後十二月晦雷徐廣云雷一作晝字又作圖字實所未詳予疑雷字誤也十二月晦日而雷有聲則所發非時故特紀異耳

太史公六國年表其叙秦之興曰量秦之兵不如三晉之疆也然卒并天下非必險固便形勢利也蓋若天所助焉或曰東方物所始生西方物之成熟夫作事者必於東南收功者常於西

北故禹興於西，堯湯起于亳，周之王也，以豐鎬伐殷，秦之帝用雍州，興漢之興自蜀漢，此殆類術家鄙誕之說，信如此言，則自漢以後，若隗囂、公孫述之徒，竊據西土，自謂天命可覲而繼，以敗滅此又何也？又曰：論秦之德義不如魯衛之恭戾，則秦不足法明矣，而復云世異變成功大，傳曰：法後王，何也？以其近已，而俗變相類，議卑而易行也。學者牽於所聞，見秦在帝位日淺，不察其始終，因舉而笑之，不敢道此，與以耳食無

異悲夫則又嘆悼其所爲若足爲後王法懼者  
凡此皆遷學術偏駁識趣卑陋處昔人譏其淺  
陋而少聞道此亦其一云

兩山墨談卷之十五